

Iloqarfimmi aallaasersortoqarsimatillugu pinerluttulerinermut inatsit naapertorlugu pineqaatissiinnaangornissaq anguniarlugu tassungalu ilanngullugu imigassamik atornerluisoqarsimaneq pissutigalugu nakkutigineqartussanngortitsilluni pineqaatissiinerit aamma aallaasit atorneqarsimasut arsaarinnissutigineqartalernissaata Kalaallit Nunaanni Pinerluttulerinermut Inatsimmut ilanngunneqarnissaat pillugit Naalakkersuisut isumaqatigiinniaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasorta q Justus Hansen, Demokraatit)

Akissuteqaat

(Pinngortitamut, Avatangiisinut Inatsisinillu Atuutsitsinermut Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasorta q Justus Hansen Demokraatiniit, sammisamik pingaarutilimmik aallussilernissamut tunngavissiineranut qutsavigaara.

Innuttaasut isumannaatsuunissaat toqqissisimanissaallu Naalakkersuisunit pingartinneqarmat qularutigineqassanngilaq. Taamaattumillu illut akornanni aallaasersornerit Kalaallit Nunaanni Pinerluttulerinermi Inatsimmut ilaatinneqarnissaat Naalakkersuisunut pingaaruteqarpoq. Taamaalilluni pineqaatissiissutaasinnaasut arlallit atorneqarsinnaalissapput – aammalu inuk illut akornanni aallaammik seqqorsimatillugu ullumikkutut akiliisussanngortitsiinnartarnek kisimi atorneqarunnaassaaq.

Aalajangersakkat Kalaallit Nunaanni Pinerluttulerinermi Inatsimmi ilaatinneqalerpata, eqqartuussivik pineqaatissiissutaasinnaasut amerlasuut atornissaannut periarfissaqalissaaq. Eqqartuussiviup pineqaatissiissutaasussamik toqqaanerani inatsisinik unioqqutitsinerup sakkortussusia aammalu pinerluuteqartup inuttut atugai eqqarsaatigineqartarput. Ilaatigut tamatuma kingunerisaanik atukkat tunngavigalugit piumasaqaateqarfiusumik pineqaatissiisinaanerit pineqaatissiissutaasinnaasunut ilaatinneqartarput – taakkunungalu imerajuttuunermut katsorsarneqarnissamut tarnikkullu nappaatinik katsorsarneqarnissamut piumasaqaatit ilaapput.

Aalajangiiffigisassatut siunnersuut tassunga assingusoq 2013-imi ukiakkut ataatsimiinnermi taamani Inatsisartuni ilaasortaasumit, Demokratiniit Jens B. Frederiksen-imit saqqummiunneqarpoq. Taamani Inatsisartuusut siunnersuut akueraat, taamaattumillu taamani Naalakkersuisuusut Inatsisinik Atuutsitsinermut Ministereqarfik qinnuigaat, illut akornanni aallaasersornermut aalajangersakkat Kalaallit Nunaanni Pinerluttulerinermi Inatsimmut ilannguteqqullugit.

Maanna Naalakkersuisuusut 29. februar 2016-imi Inatsisunik Atuutsitsinermut Ministereqarfimmut saaffiginnissuteqaqqipput, tassanilu Kalaallit Nunaanni Pinerluttulerinermi Inatsisip iluarsaanneqarnissaata, tassungalu ilanngullugu illut akornanni aallaasersornermut aalajangersakkat ilanngunneqarnissaasa pingaaruteqarnera erseqqissaatigaat. Tamatuma kingorna Inatsisunik Atuutsitsinermut Ministereqarfimmit uppersarneqarpoq, Kalaallit Nunaanni Pinerluttulerinermi Inatsisip iluarsaanneqarnera aallartinneqarsimasoq aammalu suliaq salliutinneqartoq.

Tamatuma saniatigut Naalakkersuisunit ilisimatitsissutigineqarsinnaavoq, Kalaallit Nunaanni Pinerluttulerinermi Inatsisip nutarterneqarnerani aamma allat allannguutissat, siornatigut Inatsisartuni akuerineqarsimasut ilaatinneqartariaqartut. Tassani inuiaqatigiinni sulinermit aammalu kinguaassiutitigut atorneqarnermut suliat pisoqalisinnaanerinit piffissarititaasunut maleruagassat nutarterneqarnissaat pineqarpoq.

Suliaq aallartinneqartussatut siunnersuuteqartumit kissaatigineqartoq ingerlareermat, siunnersuut itigartinneqassasoq Naalakkersuisut inassutigaat.